

15/07/2001

Bagaikan jeneral di medan pertempuran

Bahagian Ketiga

Politik: Provokasi dan penghinaan

POLITIK adalah salah satu bidang kegemaran saya. Semenjak zaman muda. Mungkin terangsang oleh perjuangan kemerdekaan yang waktu itu sedang marak di Asia dan Afrika. Maka terikutlah dalam gerakan politik yang benihnya bercambah di Tanjung Malim.

Bersama kawan-kawan yang berminat politik, kami berasa bangga apabila diintip oleh polis 'special branch'. Ramailah pemimpin Asia-Afrika yang menjadi pujaan saya. Bermula dari Mahatma Gandhi, Nehru dan Soekarno hinggalah ke Nelson Mandela. Mahatma Gandhi dan Mandela bukan saja pejuang kemerdekaan yang gagah tekad dan semangatnya, tetapi juga pejuang keadilan dan kemanusiaan yang sukar ditandingi.

Di negara kita, pemimpin pembangkang Dr Burhanuddin al-Hilmi, Ahmad Boestamam dan Dr Tan Chee Khoon adalah antara yang menyenangkan saya. Membaca dan menjejaki perjuangan mereka, menjadikan semangat dan pemikiran politik kita lebih luas dan tajam. Sebab itulah juga cita-cita hendak belajar Ilmu Kewartawanan akhirnya bertukar kepada Ilmu Sosial dan Ilmu Politik.

Kegiatan politik adalah untuk kebaikan dan dalam istilah kebaikan itu termasuklah unsur-unsur kemanusiaan. Dalam kemanusiaan itu ada keadilan, kesejahteraan, keamanan, kebebasan peribadi yang wajar. Semuanya adalah untuk mewujudkan suatu kehidupan yang aman damai, selesa dan bahagia. Tidak ada penindasan dan kelaparan, tidak ada ketakutan sesama manusia. Dapat bekerja dan beramal dengan tenang sambil mengembangkan bakat dan kebolehan masing-masing yang diberikan oleh Allah. Jadi pendapat yang mengatakan politik itu kotor, tidak betul. Yang kotor orangnya, bukan politik.

Tokoh politik pula adalah pemimpin. Orang yang bijaksana, yang sedia berkorban dan yang menjadi ikutan rakyat. Akan tetapi akhir-akhir ini tokoh-tokoh politik semakin jadi macam-macam, sehingga ramailah pemimpin yang semakin tidak disenangi dan dihormati rakyat. Membaca dan menjejaki pemikiran dan kegiatan politik mereka, sering membuat rakyat yang berfikir, jadi serba salah. Kata kawan-kawan, kita jadi tenggelam punca dan bengong politik.

Rakyat seperti diajak berperang sehingga ada yang sampai ke peringkat bermusuhan. Sopan santun pun mulai hilang. Kekasaran menjadi kesenangan setengah-setengah pihak. Sampai masjid pun ada yang tidak boleh membawa ketenangan beribadah lagi. Sampai universiti pun, seperti tidak jadi pusat ilmu dan peradaban lagi.

Politik adalah kuasa. Justeru, kegiatan politik adalah persaingan mendapatkan kekuasaan. Tetapi dalam masyarakat kita - Melayu khususnya - tidak pernah terlintas langsung, bahawa persaingan politiknya akan menjadi seperti sekarang ini. Pada akhir tahun 1970-an saya pernah menulis mengenai kuasa politik dan wang dalam Umno, tetapi tidak pernah terfikirkan korupsi politik dalam Umno akan menjadi barah-cabuk-parah seperti sekarang ini. Tidak terfikir juga, dua parti Melayu - Umno dan Pas - akan bermusuhan seperti sekarang ini. Jadi sedih dan malu! Rupanya kesenangan dan kemewahan telah membawa malapetaka kepada kita. Saya jadi pesimistik!

Demikianlah kacaunya fikiran dan perasaan, ketika hendak memulakan Bahagian Ketiga daripada tulisan yang bertitik tolak daripada ucapan Dr

Mahathir pada Perhimpunan Agung Umno yang lalu.